



UPA 2019/30  
21. maj 2019  
Aqqa Samuelsen

**Nuugaatsiarmiut Illorsuarmiullu qimarnunneqarneranni, inuiaqatigiinniit inissanik taarsiiluni agguaassinermi neqeroorutaasut pillugit apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Karl-Kristian Kruse, Siumut)

Siullermik Inuit Ataqatigiit apeqquteqaat aallaavigalugu oqallisissamik saqqummiussisumut Karl-Kristian Krusemut qujapput.

Avannaani tassaarsuortoqarnerani ullormi ilungersunartumi tupannaqisumilu inuiaqatigiit tamarmik kalluarneqarnerat ulloq manna suli eqqarsaatitsivut qaffakaajuarpoq. Piffissap taassuma nalaani isumakulunnerit, ernumanerit misigissutsitigullu qisuariaatit tamatsinnut sakkortusimaqaat, misigissutsillu qanoq oqaasertalernissaat nassuiaruminaassimallutik.

Nuugaatsiami Illorsuarnilu innuttaasut imminnut qanigisariillutik susassareqatigiillutillu ukiorpassuarni inooqatigiissimanerat piffissap sivikitsup ingerlanerinnaani pinngortitarsuup nunaqarfinnguit piioneerummagit qamuuna attortinnarsimaqaaq.

Nuugaatsiami Illorsuarnilu tassaarsuortoqarnerata nalaani innuttaaqaterpassuavut nammineq kajumissusertik atorlugu ikiuussimasorpassuarnut qujassuteqassalluta pinngitsoorusunngilagut. Inuiaqatigiittut susassareqatigiilluta ataatsimuuleraangatta nukerujussuarmik pigisaqarluta uppernarsisarparput.

Inuit Ataqatigiit inuiaqatigiinni atugarissaarneq eqqarsaatigalugu inoqatitsinnut ikorfartorneqarnissamik pisariaqartitsisunut Nunarput ikorfartueqataassasoq naleqartippaat. Inuiaqatigiittut nukittuutut ingerlariaqqissinnaasugut upperraarput. Inuiaqatigiit nukittuut atugarliornerusortaminnut illersuisuunissaq ikiuerusussuserlu ilisarnaatigaat.

Nuugaatsiarmiut Illorsuarmiullu tassaarsuortoqarnerani inoqutigiit eqqorneqartut annaasaqatigisimasaat, angerlarsimaffik toqqissisimaffiusoq, inuussutissarsiornermi pigisat nalillit (umiatsiaq, qimmit, qamutit, aalisarnermi piniarnermilu atortut il.il.) nalitoorujussuupput ulluinnarni inuuniarnermi pinngitsoorneqarsinnaanngitsutut isigisariaqarlutik. Nuugaatsiarmiut Illorsuarmiullu qallikkut pigisatigut atortulersuutitigullu annaasaqaannanngillat, aammali inooriaatsimik, anersaakkut inuunermi naleqartitanik toqqissisimasumik inuuneqarnermi pinngitsoorneqarsinnaanngitsunik annaasaqarput. Nunaqarfiit marluk ilaqutariinni qangaaniit imminut napatinnermik aallaaveqartumik inooriaaseqartut maannakkut ullormiit ullormut avissaartinneqarput.

Taamaattumik Nuugaatsiarmiut Illorsuarmiullu eqqarsaatigalugit angerlarsimaffeerunnerminni, inuunermilu toqqammavissaarunnermi naapertuilluartumik ikiorsiiffigineqarnissaasa

# INUIT ATAQATIGIIT

## Inatsisartuni



qulakkeerneqarnissaa pingaaruteqarpoq. Pisariaqarpoq Nuugaatsiaq Illorsuillu ineriartortitsinermut naapertuuttumik akisussaassuseqartumik siuarsaavigneqarnissaat.

Nuugaatsiami Illorsuarnilu najugaqartut ulluinnarni inooriaatsip uterteqqinneqarnissaa pingaartillugu nunaqarfiit nappaqqinneqarnissaat pingaaruteqarpoq. Illut pigisallu nalillit aseruatitersimasut atuleqqissappata illut nutaat sanaartorneqlernerat nuannaarutigaarput, illut sanalluagaanissaat isumannaatsumillu inissisimanissaat pingaaruteqartutut isumaqarfigalutigu. Ajornangippat illut qullasinnerusumut inissinneqarsinnaasuuppata tulluartsuoraarput, tassaarsuortoqaqqissagaluarpat mallit angusinnaangisaannut inissillugit.

Ulloq 17. juni 2017 Nuugaatsiap Illorsuillu ullumikkut inoqannginnerannik kinguneqartup, pisimasoq inuiaqatigiinnut misigissutsitigut eqqorneqaataasimaqisoq ulloq manna tikillugu suli qaangeqqajarneqanngilaq.

Tassaarsuup kingunerisaanik nunaqarfinni pineqartuni inoqutigiit eqqugaasut amerlanerpaat ullumikkut Uummannamut nuutsinneqarsimapput.

Ullormiit ullormut nunaqarfigisamit nuutsinneqarneq tassaarsuortoqarnerani inoqutigiinnut eqqugaasunut imaannaangitsorujussuusoq Inuit Ataqatigiit paasilluarpaat. Taamaattumik tassaarsuortoqarnerani inoqutigiit eqqugaasut naapertuilluarnerpaamik ikiorserneqartariaqartut Inuit Ataqatigiit isumaqarput.

Tassaarsuortoqarnerani inoqutigiit eqqugaasimasut inissikkallarneqarnerisa nalaani inissavimminnut nuunnissamik tungaanut najugarigallakkamut akilersuisannginnissamik Naalakkersuisut neriorsuilussinnarsimappata Inuit Ataqatigiit akuerisinnaangilaat. Tassami pineqartut qanimut attaveqarfigineranni paasivarput, inoqutigiit eqqugaasut illunut inissianullu inissikkallarneqarmata pisortanit oqarfigineqarsimasut illunut sanaartukkanut iserternissaasa tungaanut inissinneqarallaqqasutut isigisariaqartut (aammami taamaappoq) najungaringallakkaminnullu akilersuissanngittut, kisiannili 1. november 2018 attartortunngoriataarput, uffalu inissikkallarneqaqqaannarlutik.

Inoqutigiit eqqugaasut amerlanerpaat suli nukissatigut akiliisinnaassutsikkullu piareersimangilluinnartut, maangamut inoqutigiit eqqugaasut meerartalinnguanut allaat INI A/S -miit ukiorli aneqqusissutinik allagarsisaqattaarlutik aallartippat. Aneqqusissutit sunnguamilluunniit najugaqarfigigallagassamik innersuussuteqanngillat.

Meerartaqarluni namminerlu pisuussutigiginagu taama atugaqalersimalluni sakkortoqisoq oqariartuutigineqarpoq, inuunermi kajumissuseeruttutut toqqammavissaaruttutullu-sooq misigisimapput. Nunaqarfinnguaminni illunnguaq kialaartoq iserfigeriaannaq maqaasivaat pisariaqartillugulu.

Siunnersuuteqartup toqqammavilersuutigisamini inoqautigiit eqqugaasut illoqareersut nunagisaminni ilutaartinneqarsinnaasimanginnerat oqariartuutigimmagu Inuit Ataqatigiinniit paasilluarparput taperserlugulu. Inoqutigiinni eqqugaasuni illutaartinneqarsinnaasimangitsut pillugit Naalakkersuisut qulaajaalluaqqullugit piumasaraarput – tassami inoqutigiit eqqugaasut angerlarsimaffisaqartitaanissamut pisinnaatitaaffeqarmata.

# INUIT ATAQATIGIIT

## Inatsisartuni



Tassaarsuortoqarnerani inoqutigiit eqqugaasimasut ataasiinnaanngitsut ullumikkut inuuniarnermikkut ilungersuuteqarnerat Inuit Ataqatigiit paasilluarsinnaavaat. Tassaarsuortoqarnerani inoqutigiit eqqugaasimasut Naalakkersuisunit sumiginnagaasutut inissisimanagerat Inuit Ataqatigiit akuerinngilaat, imaannaanngitsutullu tigullugu.

Taamaattumik Naalakkersuisut Nuugaatsiarmiunut Illorsuarmiunullu neriorsuutigisimasatik piviusunngortittariaqaraat Inuit Ataqatigiit oqariartuuteqarput.

Naalakkersuisut tamaanna pillugu erseqqinnerusumik nassuiaaqqugut.